

SARS YI HLOHLOTELA VAHAKELAXIBALO LAVA NGA RIKI VA NKARHINYANA KU FAYILA MITLHERISO YA XIBALO XA MALINGHENA KU NGA SI FIKA NKARHI WO PFALA WA TI 20 NHLANGULA

Tshwane, 15 Nhlangua 2025 – Vukorhokeri bya Xibalo bya Afrika-Dzonga (SARS) byi tsundzuxa vahakelaxibalo lava nga riki va nkarhinyana leswaku siku ro pfala ro rhumela mitlheriso ya xibalo xa malinghena ya lembe i ti 20 Nhlangua 2025.

SARS yi endlile tshalatshala rin'wana na rin'wana ku olovisa no seketela phurosese yo fayila. Hi ku tirhisa tipulatifomo leti ndlandlamuxiweke ta xidijitali, Nhlahluvo lowu Tiendlekelaka, na tinomboro ta tiqingho ta mpfuneto leti fikelelekaka, vahakelaxibalo va nyikiwile matimba mo fikelela swiboho swa vona hi ku olova na vuswikoti.

Laha ku saleke ntlhanu wa masiku ku nga si fika siku ro pfala, Khomixinara wa SARS Edward Kieswetter u hlohlotela vahakelaxibalo ku tirhisa masiku lama saleke ku fayila mitlheriso ya vona. U tiyisisile xiboho xa xinawu ku fayila mitlheriso hi nkarhi no helela.

Khomixinara u hlohlotela vahakelaxibalo hinkwavo leswaku va nga papalati swiboho swa vona swa xibalo: ntsandzeko wo rhumela ntlheriso hi siku ro pfala i nandzu wa vugevenga, naswona nkavulandzelelanawu wu nga fikelerisa eka mixupulo ya vulawuri na tihakelo ta ntswalo. Tanihi xiphemu xa xikongomiso xa hina xa qhinga xo hlohlotela vulandzelelanawu hi ntsakelo no sindisa nawu, SARS yi ta ya emahlweni yi boxa no tirha ehenhla ka lava nga fikeleleriki swiboho swa vona swa xibalo.

Khomixinara Kieswetter u tlhele a yisa ku khensa eka 80% ya vahakelaxibalo lava fayileke ku nga si fika siku ro pfala ra ti 20 Nhlangua 2025. Leswi swi katsa kwalomuya ka 6 million wa vahakelaxibalo lava hlahluviweke hi ndlela leyi tiendlekelaka no amukela mivuyiselo ya vona eka 72 wa tiawara. Vutinyiketeri lebyi eka vulandzelelanawu byi tlanga xiave xa nkoka eku akeni ka tiko leri nga na vuswikoti no hakelela vukorhokeri bya nkoka bya vaaki. Byi endla ku hambana eka vutomi bya vanhu va hina vo tala.

Vahakelaxibalo vo tala va yimile ku fika eka nkarhi wo hetelela ku fayila mitlheriso ya vona, va tshemba ku fikelela siku ro pfala. Hambiswiritano, magugu ma rhamba swihoxo, miahlulo yo biha, ntshikelelo lowu nga fanelangiki, na tilayeni to leha emarhavini ya SARS. SARS yi hlohlotela vahakelaxibalo ku rhumela mitlheriso

lokohiletlhelo ku ri na nkarhi wo ehleketa kahle no papalata swihoxo. Ku fayila ka ha ri na nkarhi swi sirhelela vahakelaxibalo eka mixupulo no tiyisisa mivuyiselo, loko yi ri kona, leyi hakeriwaka eka 72 wa tiawara.

Laha ku saleke ntlhanu wa masiku ntsena ku nga si fika siku ro pfala, 7 900 531 wa vahakelaxibalo lava nga riki va nkarhinyana va fayirile mitlheriso ya vona ya xibalo, laha 854 408 va ha kayivelaka. Eka lembexibalo ra 2024, eka ku tlula 6.7 million wa vahakelaxibalo lava nga riki va nkarhinyana va fayirile mitlheriso ya vona ya xibalo xa malinghena, ku katsa lava hlahluviweke hi ndlela leyi tiendlekelaka.

Mayelana na vuxokoxoko hi xitalo, u komberiwa ku tihlanganisa na SARSMedia@sars.gov.za.

MAKUMU